

# ՀԱՅԿԱԿԱՆ ՊԵՏԱԿԱՆՈՒԹԵԱՆ ՎԵՐԱԿԱՆԳՆՄԱՆ ՓՈՐՁ ԺԵ. ԴԱՐԻ ԿԻՍԵՐԻՆ

ԱՂԱԽՆԻ Ա. ՈՒԹՈՒՋԵԱՆ

Կիլիկեան Հայկական պետականութեան կորստից լետոյ (1375), Հայոց եկեղեցին անմիջապէս փորձում է զբաղեցնել հանգած պետականութեան դատարկ մնացած տեղը: Պետականութեան վերականգնման գաղափարը հետզհետէ դառնում է Հայոց եկեղեցու իւրայատուկ գաղափարաբանութիւնը:

Եթէ ուշադրութեամբ քննենք ԺԳ.-ԺԵ. եւ աւելի ուշ դարերի Հայկական ձեռագրաց լիշատակարաններն ու մանր ժամանակագրութիւնները, ապա յստակօրէն կը տեսնենք թէ ինչպիսի՛ հետեւողականութեամբ է արծարծուած պետականութեան վերականգնման գաղափարը եւ թէ պետականութեան բացակայութիւնը ինչպիսի՛ ողբալի կացութիւն է ստեղծել բովանդակ Հայութեան համար: Ժամանակակիցներից մէկը խիստ ղիպուկ է նկատել, թէ Հայոց ազգը մնացել է անտէր, որ Հայկազուն տոհմի այգին այլեւս խաղող չի տալիս, որ այն վաղուց վերածուել է խոպանի ու այնտեղ փուշ է բուսնում, քանզի որը է մնացել «ի հօրէ եւ ի մօրէ, այսինքըն՝ ի թագաւորէ եւ ի հայրապետէ»<sup>1</sup>:

Հայաստանի քաղաքական եւ եկեղեցական իշխանութիւնները վերականգնելու մտայնութիւնն իր ցայտուն արտայայտութիւնն է գտնում մանաւանդ Վասպուրականում եւ Տարօնում: Թերթելով Վասպուրականի հոգեւորականների ձեռքով գրուած լիշատակարանները, ստանում ենք այն տպաւորութիւնը, որ դրանցում հայ թագաւորական իշխանութեան գաղափարը նոյնանում է կաթողիկոսական իշխանութեան հետ: 1401ին Հիզանում գրուած մի լիշատակարանում կարդում ենք. «... զոր տէր Աստուածն իսրայէլի պահէ անխախտ, որ չսասանի՝ զաթոռ մերոյս հայրապետի եւ զմեր ազին թագաւորի... »<sup>2</sup>: Անշուշտ, լիշատակագրի համար նոյնացում են Հայոց հոգեւոր տիրոջ՝ կաթողիկոսի եւ Հայոց թագաւորի անձնաւորութիւնները՝ բազմած նոյն աթոռին: Սա եզակի փաստ չէ: Մտացածին Հայոց թագաւորի գաղափարը կրկնում է նաեւ այլ լիշատակարաններում: Այսպէս, 1431ին գրուած մի լիշատակարանում կարդում ենք. «զոր տէր աստուած իսրայէլի պահեսցէ անսասան զաթոռ հայրապետական եւ զթագաւորական մերոյ ազին

եւ բարձրացուցէ զեղջիւր Սիոնի ի մէջ Հայաստանեայց...»<sup>3</sup>: 1458ին մի լիշատակագրող մաղթում է. «Տէր Աստուած... պահեսցէ անսասան զաթոռ հայրապետութեան եւ թագաւորական քրիստոսայդաւան»<sup>4</sup>: Բազմաթիւ են այն լիշատակարանները, որոնց հեղինակները դիմելով Բարձրեային խնդրում էին վերանորոգել «խափանեալ թագաւորութիւնն հայոց ազգի» եւ յոյս էին յայտնում թէ որեւիցէ մի պահ Աստուած վերստին կը նորոգէ «զթագաւորութիւն տառապեալ ազգիս հայոց»<sup>5</sup>:

Ինչպէս տեսնում ենք, Հայաստանի քաղաքական իշխանութեան վերականգնման գաղափարը մոռացութեան մատնուած էր: Եկեղեցական միջավայրում փայփայլում էր այն յոյսը, թէ աստուածային բարեխօսութեամբ եւ կամ որեւէ հօր տիրակալի միջամտութեամբ ի վերջոյ այն կը կատարուի: Եւ պատահական չէ, որ հենց այս ժամանակ է, որ դարձեալ շրջանառութեան մէջ է դրւում ազատագրական վաղեմի լեզուները:

Ասել թէ հայկական պետականութեան վերականգնման գաղափարի կրողը միմիայն եկեղեցին էր, ճիշդ չի լինի: Պէտք է լիշեւ, որ հենց այս նոյն շրջանում է, որ տկարացած հայ աշխարհիկ աւատատիրութիւնը վերագգեստաւորուեց եւ, ինչպէս դիպուկ նկատում է Աշոտ Գ. Յովհաննիսեանը, «ասպետական զրահն ու սուրը փոխեցին եկեղեցական փիլոնի եւ բուրվառի հետ եւ ծուարեցին իրենց եկեղեցական ազգակիցների փէշերի տակ»<sup>6</sup>: Այսպէս վարուեցին Արծրունիները, Օրբելեանները, Պռոշեանները, Հասան-Ջալալեանները եւ էլի ուրիշ շատ տոհմեր: Նման ճանապարհներով ու միջոցներով է, որ հայ ազնուականութիւնը փորձում էր ապահովագրել իր ինքնապահութեան նիւթական աղբիւրները: Եւ ահա վերագգեստաւորուած ու եկեղեցական սքեմ հագած ազնուականութեան միջավայրում էր, որ առաւել վառ էր արտայայտուում պետականութեան վերականգնման գաղափարը: Սրա ցայտուն ու վառ օրինակն է ԺԵ. դարի կէսերին Աղթամարում կատարուած փորձը:

Նշանակալից, սակայն հայ պատմագիտութեան մէջ արժանի ուշադրութեան չարժանացած այս փորձի քննական վերլուծութեանն է նուիրուած սոյն ուսումնասիրութիւնը:

Հենց սկզբից նշենք, որ այս իրադարձութեան գլխաւոր դերակատարներն են եղել Աղթամարի Չաքարիա Գ. կաթողիկոսը (1434-1464) եւ նրա հովանաւորող կարա-կոյունյու թուրքմէն տիրակալ Ջհանշահը (1437-1467): Չաքարիա կաթողիկոսը ժամանակի աչքի ընկնող եկեղեցական գործիչներից էր, իշխանատենչ ու անկասկած մտաւոր մեծ կարողութիւններով օժտուած մի անհատ: Ժամանակակիցը «սքանչելի մեծ իմաստասէր, քաջ եւ արի» է ան-

ւանում նրան, որն իբրև «պատուական հայրապետ, ուղղափառ, անբիծ ախոյեան եւ յաղթող, սրբասէր, աղքատասէր եւ ողորմած, եզակի էր բովանդակ Հայոց աշխարհում»<sup>7</sup>։ Այս Չատագովական ներբողում մենք չենք ցանկանում տեսնել սոսկ սովորական դարձած, պատեհ եւ անպատեհ առիթներով յորջորջուող ինչ-որ բանաձև։ Այս դէպքում, «աքանչեյի»ն, «իմաստասէր»ն, ու «արի»ն համապատասխանում էին իրականութեանը։ Զաքարիա կաթողիկոսն այն եզակի հայ գործիչներից էր, որին ոչ միայն խորապէս յարգում էին ու գնահատում մահմետական տիրակալները, այլեւ հաշուի էին նստում նրա հետ։ Նա սոսկ եկեղեցական չէր, այլեւ համազում դիւանագէտ էր ու զինուորական։ Դեռեւս 1458ին, երբ վանի կառավարող Ղլիճ Ասլանը աւերում ու ոչնչացնում էր երկրամասը՝ նա անձամբ գնաց Խոյ, ներկայացաւ Ջհանշահին եւ համոզեց վերջինիս՝ արչաւելու աւարառուի վրայ, որը եւ տեղի ունեցաւ։ Դա երկրամասը փրկեց յետագայ աւերմունքներից, իսկ Զաքարիայի հեղինակութիւնը խիստ բարձրացաւ։ 1459ին, երբ ուղկանցի քրդերը Սէյիդ Ալու գլխաւորութեամբ արչաւելին դէպի վանայ լճի ափերը եւ փորձեցին գրաւել Աղթամարը՝ Զաքարիա կաթողիկոսն իր տրամադրութեան ներքոյ գտնուող հայկական գործասերով հակահարուած տուեց քրդերին, գրաւեց նրանց յաստանաւերը եւ դուրս քշեց նրանց վանայ լճի առափնեայ շրջաններից։ Իսկ 1460ին, երբ Ջհանշահը դէպի Խորասան կատարած մեծ ու յաղթական արչաւանքից յետոյ վերադառնում էր Դաւրէժ, հեռատես ու դիւանագէտ Զաքարիան յաղթողին ընդառաջ գնաց շնորհաւորելու, «բազում ընծայիւք, զոր յոյժ սիրով ընկալաւ արքայն արքայից Ջհանշահ փաթշահն եւ դշխոյն Բէկում Խաթուն եւ պատուեալ մեծարեցին գնա»<sup>8</sup>։ Այս բոլորից յետոյ միայն հասկանալի է դառնում, թէ ինչու էր Ջհանշահը հովանաւորում Աղթամարի հովուապետին։ Ինքը՝ Զաքարիան աւելի մեծ ակնկալիքներ ունէր թուրքմէն տիրակալից։ Նա վաղուց եւեթ տենչում էր վերջինիս օգնութեամբ գրաւել հայոց ընդհանրական կաթողիկոսի գահը։ Տեղին է նշել, որ արեւելեան վարդապետերը եւ մասնաւորապէս՝ Թովմա Մեծոփեցին, Ժամանակին (1439-1440), երբ բարձրացուեց կաթողիկոսական աթոռը Սսից Էջմիածին տեղափոխելու հարցը, մեծ ջանքեր թափեցին Զաքարիա կաթողիկոսին իրենց կողմը գրաւելու համար։ Հենց ինքը՝ Թովմա Մեծոփեցին էր, որ բանակցում էր Զաքարիայի հետ եւ, ինչպէս գրում է Մաղաքիա արք. Օրմանեանը, «յաջողեցաւ Զաքարիան ալ իր կողմը շահիլ, եւ Սիւնեցի ու վասպուրականցի վարդապետերուն գործակից ընել Աղթամարցիներն ալ, անշուշտ Զաքարիայի աչքին ցոյացնելով,

Աղթամարէ էջմիածին անցնելու հնարաւորութիւնը<sup>9</sup>։ Հետեւաբար, Չաքարիայի ակնկալութիւններն ունէին նախահիմք։ Սակայն, 1441ին Վաղարշապատի ազգային-եկեղեցական ժողովի նախապատրաստական փուլում եւ հենց ժողովի ժամանակ Չաքարիա կաթողիկոսի թեկնածութիւնը մերժուեց։ Այս հարցում յատկապէս անհաշտ դիրք գրաւեցին Արարատեան եւ Սիւնեաց եպիսկոպոսները, մասնաւորապէս Տաթևի համալսարանի աշակերտութիւնը, որը չէր ցանկանում, «այդչափ բարձրացած տեսնել Աղթամարի բաժանեալ աթոռը, որ մինչեւ իսկ իր վրան ալ իշխէ»<sup>10</sup>։ Հենց սրանով պէտք է բացատրել Չաքարիայի բացակայութիւնը ժողովում, թէեւ իրեն ենթակալ ութ վարդապետեր՝ Աւետիս վարդապետ Սուրբխաչեցու գլխաւորութեամբ, յատուկ թղթով յայտարարեցին, թէ միաբանում են Վաղարշապատի ժողովին։ Անշուշտ, նրանք նման պատասխանատու յայտարարութիւն կարող էին անել միայն Չաքարիա կաթողիկոսի գիտութեամբ ու յանձնարարութեամբ։ Ահա թէ ինչու նա թէեւ վիրաւորուեց, սակայն չընդդիմացաւ Կիրակոս Վիրապեցու կաթողիկոս ընտրութեանը, մանաւանդ՝ վերջինս Աղթամարի հին միաբաններից էր եւ բարեացակամ դիրքորոշում ունէր իր աթոռի նկատմամբ։ Սակայն Սիւնեաց իմբաւորման ջանքերով, Կիրակոս Վիրապեցու անակնկալ արտաքսուելուց յետոյ (1443), Չաքարիան դարձեալ սկսեց կաթողիկոսական ընդհանրական դահ բարձրանալու յոյսեր փայփայել։ Եւ այժմ, երբ նա վայելում էր Ջհանշահի անվերապահ վստահութիւնը, յարմար պահ էր իրականութիւն դարձնելու իր հին երազանքը։ Բոլոր դէպքերում վերոնշեալ 1460ի տեսակցութիւնից յետոյ է, որ երբ «արքայն արքայից Ջհանշահ փաթշահն եւ Դշխոն Բէկում խաթունն», լուծ սիրով ընդունեցին նրան, Չաքարիան վերջապէս յանդգնեց իր համար խնդրել Ս. էջմիածինի աթոռը<sup>11</sup>։ Ջհանշահը, որ խիստ դժգոհ էր Գրիգոր Ժ. Մակուեցի Չալալբեկեանց կաթողիկոսից՝ (երեւի հարկերի վճարման յապաղման համար), կարգադրեց Չաքարիային հռչակել Ամենայն Հայոց կաթողիկոս։ Ժամանակակիցն այսպէս է նկարագրում այս լուծ լիշարժան իրադարձութիւնը. «Ջհանշահ Փատշահն եւ դշխոն Բէկում իրաթունն... ետուն նմա խլայ (պատուոյ զգեստ - Ա. Ու.) եւ պարգեւ զԱջ սուրբ Լուսաւորչին մերոյ սրբոյն Գրիգորի. եւ զպատիւ պատրիարկութեան։ Որոյ առաջնորդութեամբն Աստուծոյ եւ կամաւ սուրբ Լուսաւորչին եւ հրամանաւ փատշահին, եկեալ յասուածարեալ եւ յաստուածանկար սուրբ Գրիգորաչէն եւ երկնահանգէտ կաթողիկէ սուրբ էջմիածինն, յառաքելաշնորհ աթոռ սրբոյն Գրիգորի, եւ նստաւ ինքնակալ պատրիարկ ընդհանուր ամենայն

քրիստոնէական ազգի, որք են ընդ ամենայն ոլորտս տիեզերաց, եւ արարեալ զաշխարհ ամենայն լինիլ մի հօտ եւ մի հովիւ»<sup>12</sup>: Այսպիսով, օգտուելով Ջահանշահի բարեհաճութիւնից՝ նրա աջակցութեամբ 1460ի աշնանը Չաքարիան հռչակուեց Ամենայն Հայոց կաթողիկոս: Դէպքերին ականատես թովմա Մեծոփեցին ստիպուած է խոստովանել, որ շահը հաւանելով Չաքարիային, նրան տուեց «զԱջն Լուսաւորչին մերոյ Ս. Գրիգորի եւ զպատիւ պատրիարքութեան ամենայն Հայոց»<sup>13</sup>: Իսկ լիշատակագիր Ստեփանոս Արծկեցի արեղան ուղղակի շեշտում է, թէ Չաքարիան, «յայսմ ամի տիրեաց էջմիածնին եւ Լուսաւորչի սուրբ Աջոյն»<sup>14</sup> (ընդգծումը մերն է - Ա. Ու.): Այսինքն՝ շեշտուել է այն իրողութիւնը, որ Չաքարիան ոչ թէ ընտրուել է, այլ օտար բռնակալի հաճութեամբ է տիրել կաթողիկոսական գահին: Մինչդեռ մէկ այլ վասպուրականցի լիշատակագիր ցնծութեամբ արձանագրելով այս ակտը, փորձում է իր ժամանակակիցներին համոզել, թէ դա տեղի ունեցաւ աստուածային միջամտութեան շնորհիւ. «Չաքարիան աստուածատուր զօրութեամբ տիրեաց երկու աթոռացն՝ էջմիածնի եւ Աղթամարայ»<sup>15</sup>: Թէ որքան համոզիչ է հնչում աստուածային միջամտութեան հանգամանքը՝ դժուար է ասել: Սակայն այն փաստը, որ Չաքարիան էջմիածնի գահ է բարձրացել «հրամանաւ փատիշահին» չեն կարողանում թաքցնել անգամ համակիր ժամանակակիցները: Որքան էլ Չաքարիան առաջնորդում էր նեղ, անձնական ու խմբակային դրդապատճառներով, պէտք է շեշտել զոյգ աթոռների միաւորման դրական նշանակութիւնը պետականութիւնից զրկուած հայ ժողովրդի կեանքում: Դառնալով ընդհանրական կաթողիկոս՝ Չաքարիան սկսում է միջամտել նաեւ երկրի քաղաքական կեանքին, կատարել կենտրոնական աշխարհիկ իշխանութեան խիստ պատասխանատու յանձնարարութիւնները: Դրանցից մէկի խիստ յաջող ընթացքը վկայում է նրա վճռականութեան ու քաղաքական աննկուն կեցուածքի մասին: Որպէս շահի վստահուած անձ ու քաղաքական բանազնաց, 1461ի կէսերին նորընծայ կաթողիկոսը հաշտութեան բանակցութիւններ էր վարում Բաղէշի ապստամբ էմիր Շարաֆի հետ: Սա հրաժարուել էր հարկեր վճարել կենտրոնական իշխանութեանը եւ սկսել էր կողոպտել շրջակայքի հայկական բնակավայրերը: Չայրացած շահը, «բարկութեամբ առաքեաց Դ(4) զաւրագլուխս երկոտասան հազար հեծելագօրօք ի վրայ քաղաքին Խըլթա եւ զնացեալ՝ աւերեալ քանդեցին զնա եւ բազում աւար ի մի ժողովեալ՝ նստան ի վրայ բերդին»<sup>16</sup>: Անշուշտ, այս ամէնից առաւել տուժում էր խաղաղ հայ բնակչութիւնը, որին նորանոր աղէտներից, արիւնահեղութիւնից ու կոտորածներից ազատելու

նպատակով էր, որ Զաքարիա կաթողիկոսը ստանձնել էր ակամայ դիւանագէտի այս խիստ վտանգաւոր առաքելութիւնը: Զաքարիա կաթողիկոսի միջամտութեան շնորհիւ կողմերը հաշտուեցին եւ Բաղէշի տիրակալը շարունակեց վճարել սահմանուած հարկերը եւ, որ ամէնակարեւորն է, «արար խաղաղութիւն ի մէջ նոցա (այսինքն՝ էմիրի եւ շահի - Ա. Ու.), ազատեաց զամենայն խառնիճադանճ ժողովուրդն զՀայ եւ զՏաճիկ ի ձեռաց անօրինաց եւ ի դառն գերութենէ»<sup>17</sup>: Շուրջ երկու ամիս տեւեցին այս բանակցութիւնները, իսկ 1461ի Յունիսին Զաքարիան վերադարձաւ էջմիածին եւ ձեռնամուխ եղաւ Մայր Աթոռի տնտեսական վիճակի բարելաման աշխատանքներին: Մասնաւորապէս յայտնի է, որ նա վճարել է Աթոռի բազում հարկերը. «Հատուց զպարտս բոլորովին»<sup>18</sup>: Սակայն ընդդիմադիր ուժերը եւ յատկապէս Գրիգոր Ժ. Զալալբեկեանց կաթողիկոսն ու իր համակիրները չէին կարող հանդուրժել Զաքարիայի կաթողիկոսութիւնը, քանզի նախորդն էր «հայրապետութեան օրինաւոր աթոռակալ ճանաչուած անձը: Ոչ մի ժողով եւ ոչ մի օրինական վճիռ չէր որոշած անոր դադարումը, եւ ոչ ալ ինքն կամովին հրաժարած էր պաշտօնէն»<sup>19</sup>: Ահա թէ ինչու, երբ Զաքարիայի հովանաւորող Զհանշահը՝ Հայաստանի եւ յարակից շրջանների կառավարումը յանձնելով իր Հասան Ալի որդուն, հեռացաւ Արեւելք, թագաժառանգը «նենդութեամբ չարախօսաց ոմանց»<sup>20</sup>, սկսեց հալածել նորընծայ կաթողիկոսին եւ պահանջեց վիթխարի հարկեր վճարել: Ստեղծուած իրադրութեան պայմաններում Զաքարիան բարօք համարեց վերադառնալ Աղթամար: 1461ի Նոյեմբերին նա ծպտուած ու ծածուկ հեռացաւ էջմիածնից՝ իր հետ վերցնելով ընդհանրական կաթողիկոսի խորհրդանշան համարուող «ԱՂՆ սուրբ Լուսաւորչին հանդերձ այլ սպասիւք»<sup>21</sup> եւ Աղթամար հասաւ Դեկտեմբերի 11ին: Զաքարիան շատ չվշտացաւ պարագաների այս փոփոխմամբ, քանզի նա, եւ ժամանակակից լիշտակագիրները նոյնպէս, շարունակում էին իրեն յորջորջել որպէս Ամենայն Հայոց կաթողիկոս<sup>22</sup>, մանաւանդ որ ձեռքին ունէր այդ տիրոջ սուրբ առարկայական ապացոյցը՝ Սուրբ Աղբը: Ահա թէ ինչու նա շարունակում է նոյն գործուն մասնակցութիւնը ցուցաբերել երկրի ու ժողովրդի հասարակական-քաղաքական կեանքում: Դեռ աւելին, նա հետամուտ էր եկեղեցական վերամիաւորման ճանապարհով աթոռանիստ հռչակել Աղթամարը: Զէ՞ որ այստեղ էին գտնուում հայրապետական սուրբ նշանները, որոնք իրաւունք էին տալիս գերադաս լինել միւս բոլոր աթոռների նկատմամբ: Բացի այդ, Զաքարիայի համար Աղթամարը առաջին աթոռանիստ հռչակելը ինքնանպատակ չէր: Եկեղեցական միու-

Թեան միջոցով նա երազում էր նաև ժողովրդի քաղաքական մի-  
 ութեան մասին: Ջաքարիան փորձում էր ժամանակակիցների մէջ  
 ներշնչել այն պատրանքը, թէ Վասպուրականը ոչ միայն հայոց  
 հոգեւոր, այլև քաղաքական իդէերի իրագործման կենտրոնն է:  
 Քանզի միմիայն այստեղ էին պահպանուել հայոց հինաւուրց թա-  
 գաւորների շառաւիղները՝ յանձինս իր տոհմակիցների: Սա սոսկ  
 սնափառութիւնն չէր. նման մտայնութիւնն ունէր պատմական որո-  
 շակի հենք: Վասպուրականի Արծրունեաց թագաւորութեան ան-  
 կումից յետոյ այս տան ներկայացուցիչները սեփականացրեցին  
 Աղթամարի կաթողիկոսութիւնը, որը ԺԳ. դարի 20ականներին  
 որպէս օժիտ անցել էր Հայոց Սեֆեդին իշխանին<sup>23</sup>: Սա ոչ միայն  
 հիմք դրեց Արծրունեաց-Սեֆեդինեան իշխանական ընտանիքին,  
 այլև դարձաւ Աղթամարի կաթողիկոսական հարստութեան նա-  
 խահայրը: Պատահական չէ, որ ինքը՝ Ջաքարիա կաթողիկոսն ի-  
 րեն համարում էր «յազգէն Գագկայ թագաւորին»<sup>24</sup>: Ժամանակա-  
 կիցներից շատերը եւս համոզուած էին, որ նա «էր յարմատոյ եւ ի  
 ցեղէն մեծ թագաւորին Գագկայ»<sup>25</sup>: Իսկ մէկ ուրիշն էլ հաւատում  
 է. «էր թագաւորազն ի թոռնաց և շառաւիղէ արքային Գագկայ»<sup>26</sup>:  
 Եւ անա Ջաքարիան փորձում է իրականութիւն դարձնել շատ ա-  
 ւելի կարեւոր մի երազանք, քան ընդհանրական կաթողիկոսական  
 գահն ստանալն էր: 1463-1464ին նա բանակցութիւններ էր վա-  
 րում Զհանշահի հետ՝ Վասպուրականի հայկական թագաւորութիւ-  
 նը վերականգնելու հարցի շուրջ: Յաւօք, մեզ յայտնի չեն այդ  
 բանակցութիւնների մանրամասները եւ առայժմ ստիպուած ենք  
 բաւարարուել լոկ միայն կուահումներով: Առաջնային ու կարեւոր  
 էր նաև գահի յաւակնորդի հարցը: Առարկայօրէն ու՞մ նկատի ու-  
 նէր Ջաքարիան որպէս հայոց գահի հնարաւոր թեկնածու՝ երբ  
 արծարծում էր այսքան յուժ կարեւոր մի խնդիր: Աներկբայօրէն  
 թեկնածուն պէտք է լինէր մերձաւոր ազգականներից որեւէ մէկը,  
 ոչ միայն, «ի թագաւորաց զարմէ», այլև օժտուած ու յարգանքի  
 արժանի մէկը: Յիշատակարանների սուղ տուեալներից հնարաւոր  
 է մօտաւոր ճշդութեամբ պարզել Ջաքարիայի տոհմաձաւը, որը  
 եւ արել է Հ. Ներսէս Ակինեանը<sup>27</sup>: Պարզուած է, որ մեզ հետաքրք-  
 րող պահին ապրում եւ գործում էին կաթողիկոսի եղբօր՝ Գուրջի-  
 բեկի երեք որդիները: Նրանցից երկուսը՝ Ներսէսն ու Ստեփանոսը  
 բարձրաստիճան հոգեւորականներ էին, հետեւաբար յաւակնորդ  
 լինել չէին կարող: Երրորդը «պարոն» Սմբատն էր, արդէն ամուս-  
 նացած (կոչն անուանում էին Բեկի Խաթուն) ու զոյգ երեխանե-  
 րի հայր մի անձնաւորութիւն: Սմբատ Սեֆեդինեանի մասին կեն-  
 սագրական արժէքաւոր տեղեկութիւններ են պարունակում 1465ին

գրուած «ճառընտիր», ժողովածուի զոյգ լիշատակարանները: Թու-  
մա գրիչը խնդրում է իշել գրքի պատուիրատուներին եւ «մանա-  
ւանդ ստացող սուրբ գրոյս զպարոն Սմբատն, եւ զծնողսն իւր զա-  
միր Գուռջիբէկն եւ զԴունիա-Խաթունն, եւ զհաւրեղբայրն զտէր  
Ջաքարիա կաթողիկոսն, զկենակիցն Սմբատայ զԲեկի-Խաթունն,  
եւ զնախնիքն ամենայնի...»: Եւ երկրորդ լիշատակարանը՝ «Ողոր-  
մած Աստուած Յիսուս Քրիստոս, ողորմեա ամենայն հաւատացեալ  
քրիստոնէից, եւս առաւել ստացողի սուրբ գրոցս Սրմբատ Թագա-  
ւորին, եւ ծնաւղաց նորին՝ պարոն Գուռջիբէկին եւ Դունեա-Խա-  
թունին, եւ հաւրեղբաւրն տէր Ջաքարիա կաթողիկոսին եւ կենակ-  
ցին Բեկի-Խաթունին, եւ քուերն Խանում-Խաթունին, եւ նախնեաց  
ամենայնի»<sup>28</sup>: Յաւօք, նրա մասին այլ տուեաններ մեզ յայտնի չեն<sup>29</sup>:  
Ջգիտենք ո՛չ տարիքը, ո՛չ զբաղմունքը եւ ո՛չ էլ այլ մանրամաս-  
ներ, թէեւ կարող ենք ինչ-ինչ բաներ կռահել: Ահա նրա թեկնա-  
ծուութիւնն է, որ կաթողիկոսը ներկայացրեց շահին:


Սակայն, Ջաքարիային վիճակուած չէր տեսնել իր փայփայած  
երազանքի իրականութիւն դառնալը: Մեզ անյայտ է, թէ ինչ հան-  
գամանքների բերումով նա դարձեալ վերադարձել էր էջմիածին  
(Իհարկէ, առանց Սրբ. Աջի), որտեղ էլ 1464ին, ինչպէս տրամու-  
թեամբ արձանագրում է ժամանակագիրը, ընենզ եւ չարախօս ան-  
ձինք» նրան թունաւորելով սպաննեցին<sup>30</sup>: Սակայն կաթողիկոսի ա-  
նակնկալ մահը չխանգարեց նրա մեծ ծրագրի իրականացմանը:

Նորընտիր կաթողիկոս Ստեփանոս Գ. Տղան (1464-1489), որն,  
ի դէպ, Ջաքարիայի եղբորորդին էր եւ դահի յաւակնորդի հարա-  
զատ եղբայրը, ոչ միայն քաջատեղեակ էր հանգուցեալ հայրապե-  
տի ծրագրերին, այլեւ նրա անմիջական աջակիցն էր ու խորհր-  
դականը: Կաթողիկոս օժուելուց անմիջապէս յետոյ, Ստեփանոս Դ-ն  
չտապեց իրականութիւն դարձնել Ջհանշահից արդէն ձեռք բերած  
համաձայնութիւնը եւ 1465ի սկզբներին Աղթամարի Սրբ. Խաչ  
Մայր եկեղեցում մեծ հանդիսաւորութեամբ եղբօրն օժեց հայոց  
Թագաւոր. «Էւ յայնժամ, - ցնծութեամբ գրում է ժամանակագիրը,-  
օժեցին զպարոն Սմբատ Թագաւոր ըստ նախնեաց իւրոց Գագկայ,  
զի ի վաղուց անտի ազգս Հայոց չէր տեսեալ Թագաւոր: Փրկիչն  
մեր Քրիստոս զօրացուցէ զնա եւ բարձրացուցէ զաթոռ իշխա-  
նութեան մերոյ»<sup>31</sup>: Սմբատի օժման հետ աղերսուած որոշ մանրա-  
մասներ է մեզ հաղորդում Մաշտոցեան Մատենադարանում պահ-  
ւող թիւ 5702 ձեռագիրը, որը «եպիսկոպոսի եւ կաթողիկոսի ձեռ-  
նադրութեան եւ Թագաւորի օժման Մաշտոց» է՝ գրուած Աղթամա-  
րում Ստեփանոս կաթողիկոսի եղբայր, Ներսէս եպիսկոպոս գրչի  
կողմից 1471ին, այսինքն՝ դէպքերից ընդամէնը վեց տարի անց:

Ձեռագրի 212բ էջում պատկերուած է թագաւորի օծման արարողութիւնը: Կենտրոնում Ստեփանոս կաթողիկոսի եւ Սմբատ թագաւորի պատկերներն են: Կաթողիկոսը թագադրում է Սմբատին, որը չոգել է եւ գլուխը թեթեւ խոնարհել: Թագաւորից աջ պատկերուած են երեք սրբեր, իսկ ձախից՝ կաթողիկոսին ընկերակցող մի խումբ հոգեւորականներ: Եթէ վստահենք ձեռագրի նկարիչ կարապետ ծաղկողի դիտողականութեանը եւ մի պահ ենթադրենք, որ նա հարազատօրէն է վերարտադրել թագաւորի պատկերը, ապա կարող ենք ընդհանուր գծերով ներկայացնել Սմբատ թագաւորին: Սա ոչ չաա երիտասարդ, գեղեցկատեսիլ մէկն է, որ կրում է թանկարժէք քարերով զարդարուած հագուստ եւ աղամանդակու թագ:

**Արծրունի-Սեֆեդինեան Տոհմածառը ԺԵ.-ԺԶ. դարերում**  
(համաձայն Հ. Ներսէս Ալիինեանի<sup>32</sup>)

Մելիք Ստեփան  
(կինը՝ Խաթուն-Մելիք)



Այսպիսով, 1465ին Աղթամարում տեղի ունեցաւ լուծ կարեւոր մի քաղաքական ակտ: Անշուշտ, մենք հեռու ենք այն մտքից, թէ հենց այս ակտով, հենց այս ժամանակ վերականգնուեց հայկական պետականութիւնը: Իրենք՝ ժամանակակիցներն էլ էին հասկանում, որ սա լուծ փորձ էր, արտայայտութիւն: ԺԵ. դարում, «թագաւորական տուն» եւ «թագաւոր» հասկացութիւններն այլեւս չեն ունեցել

այն նշանակութիւնը, ինչ առաջներում՝ ասենք Արծրունեաց ու Բագրատունեաց պատմաշրջաններում (Ժ.-ԺԱ. դդ.): Ինչպէս ճիշդ նկատուել է, այդ ձեւական անուանում էր սոսկ, որ պահպանում էր շահագրգիռ խաւերի եւ ժողովրդի մէջ հայերի անկախութեան երազանքներին բաւարարութիւն տալու համար<sup>33</sup>: Չէ՞ որ շատ վաղուց Աղթամարի կաթողիկոսական աթոռը համարւում էր նաեւ «թագաւորական աթոռ»<sup>34</sup>: Սմբատի արքայ անուանումը աւելի հոգեբանական, ազգային ինքնագիտակցութեան նշանակութիւն ունէր, քան պետական որեւէ իմաստ: Ժիշդ է, 1465-1471ի ինն ձեռագրերում Սմբատը լիշատակուած է իրրեւ թագաւոր, սակայն բացառութեամբ երկու դէպքի, մնացած եօթ դէպքերում նա լիշատակուած է միմիայն ժամանակագրական նշանակութեամբ, ինչպէս օրինակ՝ «գրեցաւ սա ի թվականիս Հայոց ի Զ եւ ի ԺԴ (1465), ի հայրապետութիւն տեառն Ստեփանոսի եւ ի Սմբատայ թագաւորին»<sup>35</sup> կամ «[Աւարտեցաւ]... (1466) ի հայրապետութեան տեառն տէր Ստեփանոսի եւ պարոն Սմբատայ, ի թագաւորութիւնս հայոց»<sup>36</sup> եւ յն.: Մնացած երկու դէպքերից մէկում նորրնծայ թագաւորը հանդէս է գալիս որպէս ձեռագրի պատուիրատու, իսկ միւսում՝ վաճառող: Եւ վերջ՝ Ուրիշ ի՞նչ գործունէութիւն է ունեցել այս «հայոց թագաւոր Սմբատը»՝ անյայտ է, լիշատակարաններն այդ մասին լուծւած են:

Ո՞րն է 1465ի Աղթամարի ակտի իրական դրդապատճառը: Միթէ իրօք Ջաքարիա եւ Ստեփանոս կաթողիկոսներն անկեղծօրէն հաւատում էին, թէ Սմբատի թագաւորութեամբ վերականգնուելու էր հայոց պետականութիւնը եւ կամ ինչպէս ենթադրում է Ակինեանը, դա հետապնդում էր Աղթամարի աթոռը կաթողիկոսական միւս աթոռներից գերազահ ներկայացնելու հետու գնացող եկեղեցական ու քաղաքական նպատակներ: Ինչպէս արդէն նշել ենք, հենց այդ ժամանակ է, որ էջմիածնի կաթողիկոսական գահի շուրջը լարուած պայքար էր ընթանում եկեղեցական ու աշխարհիկ աւատատէրերի երկու ուժեղ խմբակցութիւնների միջեւ: Առաջինի մէջ էին միաւորուել Արարատի ու Սիւնիքի մեծատունները, իսկ երկրորդի՝ Վասպուրականի: Անշուշտ, պատահական պէտք չէ համարել, որ հենց այս պահին, Սմբատի թագաւոր հռչակուելուց քիչ առաջ, Սեֆեդինեանները սկսեցին լիշել իրենց պանծալի արքայածնութիւնը եւ լիշատակագիրները մէկը միւսի ետեւից սկսեցին շեշտել Աղթամարի կաթողիկոսների «յազգէն եւ ի ցեղէն Գագկայ» սերուելը: Կասկած չկայ, որ այդ լիշատակագիրները քաղաքական պատուէր էին կատարում, որ նրանց լանձնարարուած էր նախապէս:



*Թագաւորի օձման արարողութիւն (Մաշտոցի անուան  
Մատենադարան, ձեռագիր համար 5702, էջ 212բ):*

Տեսական ու գաղափարական հող էր նախապատրաստուում նախ ընդհանրական կաթողիկոսական գահը գրաւելու եւ ապա էջմիածնի ու Աղթամարի կաթողիկոսական գոյգ աթոռները վերամիաւորելու ուղղութեամբ: Ահա թէ ինչու էր անհրաժեշտ Սմբատի խաղաքարտը: Աղթամարը միանգամից առանձնանում էր բոլորից: Նա միանգամից յայտնուում է ամենայն ուշադրութեան կենտրոնում, քանզի հայոց նորընծայ թագաւորի նստավայրն էր:

Բոլոր դէպքերում, որքան էլ Սմբատի թագաւորութիւնը համահայկական բովանդակութիւն չունէր եւ չէր էլ կարող ունենալ, որքան էլ այն հետապնդում էր ինչ-ինչ եկեղեցական ու քաղաքական նպատակներ, անտեղի են որոշ ուսումնասիրողների ուղղակի լիշաչար, անգամ թշնամական վերաբերմունքը Զաքարիա կաթո-

ղիկոսի այս գաղափարի ու Սմբատ Թագաւորի անձի նկատմամբ: Դեռեւս Ակինեանն էր, որ Սմբատին անուանում էր «խաղալիք Թագաւոր»<sup>37</sup>, Յովհաննիսեանը՝ «դիւանագիտական խրտուիլակ»<sup>38</sup>, Խաչիկեանը՝ «քաղաքական խրտուիլակ»<sup>39</sup>, «բարեմասնութիւններէց գուրկ մի անձնաւորութիւն»<sup>40</sup>, Կիրակոսեանը՝ «օրապակաս Թագաւոր»<sup>41</sup> եւ ըն. եւ ըն.: Յատկապէս տարակուսելի է Խաչիկեանի պնդումը՝ Սմբատի իբր, «բարեմասնութիւններից գուրկ մի անձնաւորութիւն» լինելու, վերաբերեալ: Որտեղի՞ց է գալիս նման պնդումը, մնում է անյայտ: Չէ՞ որ Սմբատի մասին բոլոր լիշատակարանները նման պնդման հիմք չեն տալիս: Եւ երկրորդ՝ ուսումնասիրողներից շատերը ծաղրելով Սմբատի «օրապակաս Թագաւորութիւնը», գրում են, թէ այն դուրս չեկաւ Աղթամարի սահմաններից եւ գոյատեւելով մէկ-երկու տարի՝ մինչեւ Ջհանշահի մահը (1467), ընդմիշտ մոռացուեց: Նման տեսակէտերը, մեղմ ասած, թիւրիմացութիւն են: Նախ Սմբատին որպէս հայոց Թագաւոր լիշատակում են ոչ միայն Աղթամարի լիշատակագիրները, այլեւ բաւականին հեռու գտնուող գրիչները: Օրինակ՝ Մոկաց գաւառի Բոնաշէն գիւղում գրիչ Մխիթարը եւ նոյն գաւառի Փասավանք գիւղում գրիչ Իսրայէլը 1466ին լիշատակում են հայոց Թագաւոր Սմբատին՝ փաստ, որ ինքնին շատ յատկանշական է ու կարեւոր: Երկրորդ՝ Սմբատի թէկուզ եւ ձեւական Թագաւորութիւնը Ջհանշահի մահով վերջ չգտաւ, ինչպէս պնդում է Յովհաննիսեանը<sup>42</sup> եւ նրան երկրորդելով՝ Վարդանեանը<sup>43</sup>: Յիշատակարաններից մէկում, որը վերաբերում է 1471ին (գրիչ Ներսէս Եպիսկոպոս), նշում է, որ այն գրուել է «... ի հայրապետութեան սորին տեառն Ստեփանոսի, եւ ի նոր Թագաւորիս մեր պարոն Սմբատի»<sup>44</sup>: Սա յստակօրէն փաստում է այն իրողութիւնը, որ Սմբատի Թագաւորութիւնը գոյատեւել է մինչեւ 1471 եւ ոչ թէ 1467: Ենթելով այն իրողութիւնից, որ նոյն 1471ին Աղթամարում գրուած Մաշտոցի լիշատակարանում գրիչ Հայրապետը, որն ի դէպ Սմբատ Սեֆեդինեանի զարմիկն էր (մօրաքրոջ որդին), ժամանակը նշելիս լիշատակում է միայն «ի հայրապետութեան տեառն Ստեփանոսի» եւ լռութեան մատնում Թագաւորի անունը, մեզ ենթադրել է տալիս, որ հենց այդ թուականին էլ Սմբատը մահացել է եւ կամ զրկուել գահից<sup>45</sup>: Եւ վերջապէս երրորդ՝ Սմբատ Սեֆեդինեանի անունը անմիջապէս չմոռացուեց, ինչպէս գտնում են ոմանք: Նրա լիշատակը դեռեւս շատ երկար պահպանւում էր Վասպուրականում: Ապացոյց կարող է ծառայել Ակինեանի կողմից շրջանառութեան դրուած մի լիշատակարան, որը դուրս է մնացել ուսումնասիրողների ուշադրութիւնից: Գրիչ Մարգարէ

Արճիշեցին 1543ին գրած Սաղմոսարանում խօսելով բանաստեղծ, Աղթամարի կաթողիկոս Գրիգորիս Ա. Աղթամարցու մասին, նշում է, որ սույն գիրքը լիշատակ է Գրիգորիսի ծնողներին, «եւ հաւուն (այսինքն՝ պապին – Ա. Ու.) իւրոյ Սմբատ թագաւորին»<sup>47</sup>:

Այսպիսով, Սմբատ Սեֆեդինեանը մի կարճ պահ ժամանակակիցներին լիշեցրեց վասպուրականի, ինչու չէ նաեւ ըովանդակ Հայաստանի, անցեալի փառքերը: Եւ որքան էլ քիչ իրական էին Աղթամարի կաթողիկոսների երազները թագաւորական գալիսոնի մասին, այնուամենայնիւ դրանք եւս որոշակի հետաքրքրութիւն են ներկայացնում հայ ազատագրական մտքի պատմութեան տեսակէտից եւ ցուցանիչ են այն բանի, որ հայկական պետականութեան վերականգնման գաղափարը երբեք չի լքուել Հայաստանում ու մոռացուել:

### ԾԱՆՕԹԱԳՐՈՒԹԻՒՆՆԵՐ

- <sup>1</sup> Հ. Ղ. Մ. Ալիշան, *Կամենից. Տարեգիրք Հայոց Լեհաստանի եւ Ռումինիոյ հաւաստչեայ լաւերուածոյք*, Վենետիկ, 1896, էջ 169:
- <sup>2</sup> *Ժ. դարի հայերէն ձեռագրերի լիշատակարաններ*, մասն առաջին (1401-1450 թթ.), կազմեց Լ. Ս. Խաչիկեան, Երևան, 1955, էջ 8:
- <sup>3</sup> *Նոյն*, էջ 412:
- <sup>4</sup> *Յուցակ հայերէն ձեռագրաց վասպուրականի*, կազմեց Երուանդ Լալայեան, պրակ առաջին, Թիֆլիս, 1915, սիւնակ 428:
- <sup>5</sup> Արք աղբիւրներից նշելի են յատկապէս Ե. Լալայեան, *Հայ գրչագիրներ*, գիրք Բ., Թիֆլիս, 1897, էջ 278. Նօտարք հայոց, հաւաքեալ եւ ի լոյս ածեալ ձեռամբ Ղեւոնդ վարդապետի Փիրղալեմեան Տոսբեցու, վարագալ վանուց վանականի, Կ. Պոլիս, 1888, էջ 208-209:
- <sup>6</sup> Ա. Գ. Յովհաննիսեան, *Դրուագներ հայ ազատագրական մտքի պատմութեան*, գիրք 1, Երևան, 1957, էջ 455-456:
- <sup>7</sup> Փիրղալեմեան, էջ 209. Համտ. Հ. Ներսէս վ. Ակիւնեան, *Գաւազանագիրք կաթողիկոսաց Աղթամարայ*, պատմական ուսումնասիրութիւն, Վիեննա, 1920, էջ 87:
- <sup>8</sup> Ակիւնեան, էջ 88:
- <sup>9</sup> Մաղաքիա արք. Օրմանեան, *Ազգապատում*, հատ. Բ., Կ. Պոլիս, 1914, սիւնակ 2094:
- <sup>10</sup> *Նոյն*, սիւնակ 2112:
- <sup>11</sup> *Ժ. դարի հայերէն ձեռագրերի լիշատակարաններ*, մասն երկրորդ (1451-1480 թթ.), կազմեց Լ. Ս. Խաչիկեան, Երևան, 1958, էջ 172:
- <sup>12</sup> Աւաքել Դաւրիթեցի, *Գիրք պատմութեանց*, աշխատասիրութեամբ Լ. Ա. Խանյարեանի, Երևան, 1990, էջ 331-332: Ինքը՝ Դաւրիթեցին, սոյն լիշատակարանը քաղել է մի ձեռագիր Յայմաւուրքից, որը գրուել էր «յամի թուականութեանս Հայոց ԶԺ (1461) ամին, լերկիրս Քաջբերունուոյ, ի քաղաքս Արճէշ» (*Նոյն*, էջ 331):
- <sup>13</sup> Թովմա Մեծոփեցի, *Յիշատակարան*, Թիֆլիս, 1892, էջ 12:
- <sup>14</sup> Փիրղալեմեան, էջ 196:

- <sup>15</sup> Լաբախան, *Յուցակ*, սիւնակ 436: Ինքը՝ Չաքարիա կաթողիկոսը, դա բացատրում է հետեւեալ կերպ. «Փատշահն, [որ] տեսաւ ասաց՝ երբ դու հնց բաւ մարդ ես՝ էջմիածին [և] աջն քեզ մեք էլ լանձն առաք էջմիածնի սիրտն հա[մար]», (*Ոսաչիկեան, Տե. դարի ...*, մասն երկրորդ, էջ 173):
- <sup>16</sup> *Տե. դարի...*, մասն երկրորդ, էջ 174:
- <sup>17</sup> Դաւրիժեցի, էջ 333:
- <sup>18</sup> Ս. Գ. Լեւոնեան, *Աղթամարայ կաթողիկոսները. սկիզբէն ցվերջ*, *Բիւզանդիոն, օրաթերթ*, Կ. Պոլիս, 1900, 8 Սեպտեմբերի, No. 1195, էջ 1:
- <sup>19</sup> Օրմանեան, սիւնակ 2163:
- <sup>20</sup> *Ոսաչիկեան, Տե. դարի...*, մասն երկրորդ, էջ 175:
- <sup>21</sup> Դաւրիժեցի, էջ 333:
- <sup>22</sup> Փիրղալիմեան, էջ 216, 217, 219. Հմմտ. Հ. Ղ. Մ. Ալիշան, *Այրարատ. Բնաշխարհիկ Հայաստանեայց*, Վենետիկ, 1890, էջ 198. *Բիւզանդիոն*, 1908, No. 3500 եւ ընդ.
- <sup>23</sup> Ալդ մասին մանրամասն տես Ակիւնեան, *Գաւազանագիրք*, էջ 38-39:
- <sup>24</sup> Փիրղալիմեան, էջ 208:
- <sup>25</sup> Գ. Վ. Սրուանձոնեանց, *Թորոս աղբար*, մասն Բ., Կ. Պոլիս, 1884, էջ 447:
- <sup>26</sup> Դաւրիժեցի, էջ 331:
- <sup>27</sup> Ակիւնեան, *Գաւազանագիրք*, էջ 108:
- <sup>28</sup> Բ. Սարգիսեան, *Մայր ցուցակ հայերէն ձեռագրաց մատենադարանին Մխիթարեանց ի վենետիկ*, հատ. Բ., Վենետիկ, 1924, էջ 419. Հմմտ.՝ *Ոսաչիկեան, Տե. դարի...*, մասն երկրորդ, էջ 238-239:
- <sup>29</sup> Սմբատ Սեֆեդիեանի մասին գորութիւն ունեցող առանձին թուցիկ ակնարկներից մասնաւորապէս տես Տուրոնի, «Հայ թագաւոր մը Տե. դարուն մէջ», *Իրաւունք*, հանդէս, Վաւուա, 1911, No. 5. Հ. Ներսէս վ. Ակիւնեան, «Գրիգորիս Ախթամարցի», *Հանդէս ամսօրեայ*, Վիեննա, 1915, թիւ 1-12 (Յունուար-Դեկտեմբեր), սիւնակ 18-64. Կոյնի, «Գրիգորիս Ա. կաթողիկոս Ախթամարի կեանքն ու քերթուածները», Վիեննա, 1958. Կոյնի, *Գաւազանագիրք*, եւ ընդ.
- <sup>30</sup> Փիրղալիմեան, էջ 220: ԺԶ. դարի Անանուն ժամանակագիրը թէեւ լիշատակում է 1463ը («ԶԺԹ թուին Չաքարիա կաթողիկոս դեղեցին մեռաւ», տես՝ *Մանր ժամանակագրութիւններ*, 13-18րդ դդ., հատ. 1, կազմեց՝ Վ. Ա. Յակոբեանը, 1951, Երեւան, էջ 143), սակայն անտարակոս է, որ դէպքը տեղի է ունեցել 1464ին:
- <sup>31</sup> *Բիւզանդիոն*, 1900, No. 1196:
- <sup>32</sup> Ակիւնեան, *Գաւազանագիրք*, էջ 108:
- <sup>33</sup> *Գրիգորիս Աղթամարցի, XVIդ.*, ուսումնասիրութիւն, քննական բնագրեր եւ ծանօթագրութիւններ Մալիս Աւագրեզեանի, Երեւան, 1963, էջ 16:
- <sup>34</sup> Լաբախանց, *Յուցակ*, սիւնակ 428, Հմմտ.՝ սիւնակ 504:
- <sup>35</sup> *Ոսաչիկեան, Տե. դարի...*, մասն երկրորդ, էջ 237:
- <sup>36</sup> Նոյն, էջ 249:
- <sup>37</sup> Ակիւնեան, *Գաւազանագիրք*, էջ 87:
- <sup>38</sup> Յովհաննիսեան, *Դրուագներ*, Հ.1, էջ 450:
- <sup>39</sup> *Ոսաչիկեան, Տե. դարի ...*, մասն երկրորդ, էջ 573:

- <sup>40</sup> Լ. Ս. Նաչիկեան, «Հայաստանի քաղաքական վիճակը եւ սոցիալ-տնտեսական բարեփոխումները XIV-XV դարերում», Հայ ժողովրդի պատմութիւն, հատ. 4, Երեւան, 1972, էջ 44.
- <sup>41</sup> Գ. Ե. Կիրակոսեան, Հայաստանը Լանկեամուրի եւ Թուրքմէն ցեղերի արշաւանքների շրջանում, Երեւան, 1997, էջ 332.
- <sup>42</sup> Նաչիկեան, ՏԵ. դարի..., մասն երկրորդ, էջ 249-250.
- <sup>43</sup> Յովհաննիսեան, Դրուագներ, հ. 1, էջ 450.
- <sup>44</sup> Վ. Մ. Վարդանեան, Վասպուրականի Արծրունեաց թագաւորութիւնը 908-1021 թթ., Երեւան, 1969, էջ 258. Տե՛ս նոյնի «Սեֆեդինաններ» բառարտումը Հայկական Սովետական Հանրագիտարանում (հատ. 10, Երեւան, 1984, էջ 349).
- <sup>45</sup> Նաչիկեան, ՏԵ. դարի..., մասն երկրորդ, էջ 309.
- <sup>46</sup> Նոյն, էջ 312.
- <sup>47</sup> Ալիեան, «Գրիգորիս Աղթամարցի», սիւնակ 33.

AN ATTEMPT TO  
REINSTATE ARMENIAN STATEHOOD IN  
THE MID-FIFTEENTH CENTURY  
(Summary)

AGHAVNI UTUDJIAN

After the collapse of the Cilician Armenian Kingdom in 1375, the Armenian Church remained the sole major institution with relatively secure administrative authority in the country. In addition to this, many representatives of the Armenian noble families had become clergymen to safeguard their family fortunes.

This empowered the Armenian Church to become the foremost player in the Armenian effort to reinstate the Armenian Kingdom.

The Aghtamar Catholicos, Zakaria III (1434-1464), became the driving force among the Armenian Church leaders who tried to put into effect this far-reaching plan.

His political shrewdness led him to cooperate with the Kara Koyunlu leader, JihanShah (1437-1467). The latter supported Zakaria III in his attempt to attain the Catholicosate of Ejmiatzin in 1460.

On the other hand, Zakaria could not realize his next plan of unifying the Catholicosates of Ejmiatzin, Aghtamar and Sis. Against unsurmountable pressures he was forced to leave Ejmiatzin in disguise in 1461. Yet, in 1464 he was back in Ejmiatzin, only to die when poisoned that same year.

Nevertheless, Catholicos Zakaria III's plan of reinstating the Armenian kingship materialized, even though he couldn't see its realization.

In early 1465, in the church of the Holy Cross, on the island of Aghtamar, Catholicos Stepanos IV (1464-1489) anointed Smbat Sefedinian as king of the Armenians.

Reinstating the Armenian kingship did not mean reinstating Armenian statehood; however, it can be considered as a step in that direction and a reflection of the Armenian nation's desire to reestablish its statehood.